

Preparacionnan a cuminsa pa renobacion di John F. Kennedy School

Edificio lo reuni tur departamento di Enseñanza, entre otro



RECIENTEMENTE Gobierno di Aruba a duna instruccion na Departamento di Obranan Publico pa duna inicio na un serie di trabounan anticipando e proceso di renobacion y ampliacion di monumento John F. Kennedy. Prome Minister Mike Eman hunto cu coleganan di Infraestructura Benny Sevinger y di Enseñansa Arthur Dowers, tabatin un encuentro cu prensa dialuna mainta caminda a duna detayenan di e proyecto, pero tambe a pone enfasis riba e importancia cu e tin pa pais Aruba

den diferente aspecto. E renobacion di e edificio, cu pa hopi decada tabata tin un rol importante den formacion di techniconan na Aruba, ta rescata otro monumento historico di nos isla. Pa hopi tempo e compleho di edificionan aki a keda negligia, pero e vision di Gabinete Mike Eman, ta pa rehabilita nan pa asina e monumento aki por tin un funcion nobo y importante pa nos comunidad. "E ta duele ora bo mira cu despues di tanto aña, el a keda para pa su cuenta, dor di

un gobierno no a worry cune." Asina Minister Dowers a bisa. "Mi ta sumamente orguyoso di ta forma parti di e team cu awe a logra cu e cosnan ta diferente pa e pais aki."

E proyecto aki ya tin varios aña andando for di momento cu a Consejo di Minister a duna instruccion na e titular di infraestructura pa traha riba e plannan. Mientras tanto, aña pasa Gobierno a firma un MoU (Memorandum of Understanding) cu SOGA (Stichting Onro-

erend Goed Aruba) pa hunto percura pa renobacion total di e edificio cu ta ubica, por cierto, na un punto mas central di nos isla tanto local como pa nos bishitantenan.

Prome Minister Eman a splica na medionan local cu e rescate di e edificio aki ta importante no solamente como un monumento historico y futuro sede di e conhunto di departamentonan cu ta cay bou di Departamento di Enseñansa, pero tambe for di punto di bista di e relacionnan diplomatico cu un pais amigo manera ta Merca. No ta muestra bon pa un edificio cu ta carga e nomber di un ex-Presidente asina stima y importante, keda para den ruina.

Un bes cla, e compleho tambe ta trece cune un reduccion drastico den e pago di huur actual di edificionan rond di Aruba, pero tambe ta hisa e prestacion y servicio di e departamentonan pa motibo cu varios departamento, cu awo ta separa, ta haya un compleho na unda tur por traha hunto. Pais Aruba ta bay spaar un total di 2.5 milyon Florin na huur pa aña, segun Minister Sevinger a duna di conoce na e conferencia. Den e acuerdo benefico firma, SOGA ta

percura pa e mantencion di e edificio tambe.

Premier Eman a recorda cu aña pasa el a muestra famia Kennedy, durante un bishita oficial na Merca, e plannan di e renobacion di e edificio. Segun e mandatario, e famia a keda masha emocionada y complaci cu e plannan cu Aruba tin pa, no solamente rescata e structura cu ta hiba nomber di nan ser stima y icono di historia mundial, pero tambe cu ta bin cu un auditorium acerca. "Den e auditorium ta bin un luga cu ta un espacio destina pa duna lectura, den un tamaño cu no tin ainda na Aruba y ta necesario. E lo tin capacidad pa entre 250 y 300 persona," Prome Minister a bisa.

DOW ta encarga di kita tur bentana, haci limpi y lanta e cura di proteccion mientras cu ta haciendo preparacionnan pa e destaho publico y otorga e contract na e contratista cu lo percura pa e trabounan necesario tuma luga lo mas pronto posibel. Ta spera cu pa proximo aña, e trabounan lo culmina y tur seccion di Departamento di Enseñansa, Cultura, UNESCO y tambe Parlamento Hubenil, ta muda.

Pronto trabounan di restauracion di scol tecnico JFK ta cuminsa Prome Minister Eman "Scol John F. Kennedy a hunga un rol central y intense den nos sociedad"



Para dilanti di e edificio decaí unda antes tabata scol tecnico John F. Kennedy, Prome Minister Eman a papia riba e pronto renobacion di e edificio monumental aki. "Esaki ta otro momento historico den renobacion di centro di ciudad". Eman a papia di e MOU cu a wordo firma cu SOGA pa yega na un renobacion completo di e edi-

ficio JFK cu ta un monumento tanto pa e edificio riba su mes pa loke ta trata su arkitektura, como tambe e aspecto hopi profundo y relacion intenso cu comunidad di Aruba. "E scol aki a produci un cantidad grandi di tecnico cu awe ta lidernan importante den hopi empresa y organisacion na Aruba". Eman ta corda cu tabatin un

concentracion hopi grandi riba e calidad di enseñansa cu tabata wordo duna na e scol tecnico aki. Alumnonan por a siña un ofishi na e scol mes y cu te dia di awe esaki tin un bon nomber. "Esaki ta resalta tambe den e mercado laboral. Ta pesey cu nos ta asina contento cu un scol cu tin tanto nificacion pa Aruba den e as-

pecto monumental, arkitectonico y historico pa pais Aruba ta para dilanti su renobacion y rescate". E monumento cu tin un lugar special den curason di pueblo di Aruba ta bay haya su restauracion. Prome Minister Eman tabatin palabranan di gradicimento pa departamento di DOW y Infrateam pa e trabounan di diseño cu a wordo haci. Nan a haci esaki kedando mas cerca posibel di tur aspecto monumental cu mester a tene cuenta cu nan. Banda di su restauracion e edificio ta haya un ampliacion tambe na unda tur departamento di enseñansa por wordo acomoda.

Mescos cu su coleganan Sevinger y Dowers Prome Minister Eman a enfatisa cu asina cu e edificio keda cla esaki ta bay scapa Gobierno y pueblo di Aruba un cantidad grandi placa cu actualmente ta wordo paga na huur pa e departamentonan concerni. "Esaki ta un edificio cu ta hunga un rol central den

nos sociedad. E ta refleha e calidad di pais Aruba y e calidad di nos aspiracionnan con unda nos kier hiba nos pais den futuro". Eman a bay bek den tempo y ta recorda con tempo e edificio a wordo inaugura el a wordo dedica na Presidente Mericano John F. Kennedy. "Historicamente ta asina cu na momento cu un edificio wordo dedica na un presidente cayden un estado di deterioro asina, protocolariamente y den bo relacionnan cu e pais di unda e presidente ta bin, e no ta e miho ehempel cu bo por duna. Ta pesey hopi bes mi a pone prioridad pa e edificio aki haya su restauracion. No unicamente pa motibo di e bon relacionnan cu nos tin cu famia Kennedy, pero tambe pa e echo cu un edificio dedica na un presidente di un pais amigo y grandi manera Merca ta den e estado aki, no ta e cos di mas corecto pa nos pais". Eman ta contento cu renobacion di e scol tecnico aki ta un paso mas leu.